

Società d'Ütil public da Sent **Referat da Töna Schmid**

Alch da l'actività da la Società d'Ütil public da Sent **daspö sia fundaziun fin al 1962**

Referat public arrandschà da la società als 25 november 1962 in sala cumünala
Referent: Töna Schmid, anteriur president da l'Ütil public 1942 – 1955
Restampà e lià da la scoula secundara da Sent, december 1999

Stimats convaschins da Sent

Guardar inavo sün quai chi'd es passà nun es per quel chi vain vegl adüna üna chosa agreabla. Dasper als mumaints chi sun restats impress per lur success as sto render quint eir da tuot quai chi's vess pudü far e chi per ün motiv o tschel es gnü interlaschà e sto per consequenza gnir cuschidrà sco sconfitta da nos vulair. Quai vaglia eir per la vita da nossa società chi ha das-chü survivor tantas da sias sours. Eschna in cas da'ns allegrar istess in quista situaziun da quai chi'd es gnü raggiunt sainza ans laschar discuraschir da tschai chi nu's ha pudü o vulgü far? Eu craj, cha güst per la Società d'Ütil public da Sent saja quai pussibel in repassond l'ourdvart richa e salüdaivla actività tras 8 decennis da vita a böñ dal cumün, portata per buna part da glied consciainta da lur dovair vers sia populaziun.

Chenüna es sia data da naschentscha?

Id es pussibel da tilla datar, eir scha tuot quels chi till'han fundada sun dalönch nan its via pro la grond'armada, e cha da lur deliberaziuns fin a l'on 1894 sun idas persas tuottas scripturaziuns. Ch'ella ha existü avant quel on cumprovan duos referats tgnüts in seis ravuogl, dals quals sun malavita avant man be s-charsas notizchas. Il prüm da quels, dal meidi da Sent, dr. Jon Paul Küng, datescha dals 30 schner 1895, il seguond, tgnü da sar magister Duri Pitschen, dals 30 avuost 1911. La protocollaziun da quist referat, pisserada da sar magister Din Peer tuna seguaintamaing:

"La Società d'Ütil public füt fuondada nel 1875 / 1876 ed as mettet fingià quella vouta la mera da cultivar la vita sociala e promover ogni progress. Già nels prüms ans da sia vita lavura ella vi da la revisiun da la Constituziun cumünala e la reorganisaziun da l'Uorden da fö. Ella lascha eriger alleas süllas stradellas, instruischa il public tras lectura e referats e lascha arrivar divers subsidis a povers, amalats etc. Ella as acquista ün toc terrain, ingio vain eret ogni an il glatsch, ingio pitschens e grands pon patinar. Col giavüsch, cha nossa Società eir nel avegnir possa prosperar ed agir pel böñ da nos comün e seis abitants finischa il referent sia lavur..."

Causa cha dal prüm referat, tgnü da dr. Küng, nun as po a man dal protocol relevar ingüna data quant al cumanzamaint da la Società, as po dimena cun vaira sgürezza as laschar sül on da naschentscha 1875 / 1876, malgrà la constataziun forsa be mal incletta da l'actuar dal 1935, cha'l president da quella haja comunicà als 22 avuost da quel on, il 50avel anniversari da l'Ütil public. Tenor magister Duri Pitschen füss dimena la fundaziun capitada pür 10 ons plü tard, dal 1885.

Id es intant vaira sgür, cha dr. Küng as referiva in seis referat dal 1895 sül on da naschentscha dal **1875**, e na 1885. Da quai sa da relatar il protocol scrit da magister Melcher Nold quant al referat da Küng:

"Da Sigre Dr. Küng, Präs. della società gnit portà avant l'istorgia da sia naschentscha fin al di d'hoz et eir quintà sü ün inter numer d'occasiunis nellas qualas la società demosset tras seis agir, ch'ella merita plainamainch il nom da Società d'Ütil public, non s-chivind ne cuosts ne fadias per operar per bain da societats et singuls. Sigre. Präs. referit medemamainch chia d'üna certa epoca eira entrà nella società per uschè dir üna letargia, chia la società pareva squasi da volair ir incunter a sia mort: però ella as podet alagrevlamainch darcheu rinforzar. Lavurs da singuls commembers, multifaris referats, dumandas da granda importanza per il comün, gnittan della società discussiunadas e rendettan la vita nellas seduttas plü vieplü granda. Novs commembers entrettan annualmainch e con ciò s'ingrandittan las entradas usche chia la società podet far bain bler e plü grandas spaisas per general ütil. – Üna seria da bels ans per la società passet, però plan a plan s'refredit il zeili e las entradas dvantettan adüna plü raras. Bain blers commembers sortittan et üna nova perioda da stagnaziun para arrivada. Als vegls e fidels commembers sto que reuschir danovmainch da verificiar la società, tras tgnair insembel et as preschantar per quella, eir d'uossa inavant sco per il passà. Sigre. Dr. Küng seret seis discuors cun la recomondaziun als commembers, da non smanchiar il bel, nöbel scoppo della società et da render tras lavur vicendaivelmainch agreablas las sairadas da radunanza..."

Cha quist "tgnair insembel" ed as radunar diligiantamaing a sairadas cumünas gniva da quel temp pratichà, cumprouva güst l'attività da l'inviern 1894 / 1895. I sun protocolladas las reuniuns dals 30 schner, 20 favrer, 6 marz e 20 marz, tuottas cun üna seria da tractandas. Dr. Küng referischa darcheu sves als 6 e 20 marz sur d'ün tema da portada essenziala: *"La reorganisaziun da nossas scoulas in cumün"* chi attiran ün grond auditori. Main frequentadas paran dad esser statta las sezzüdas internas da la società, ingio chi vain decis da manar tras darcheu ün jouslada, pisserar pel glatsch da quel inviern, preparar ün teater e mantgnair la stà seguainta las alleas vers Scuol e Crusch. Malgrà quist'attività apparaintamaing dret viva plondscha però il nouv actuar Anton Conradin davu la radunanza dals 4 december 1895:

"Commembers comparüts eiran be 9, da maniera cha da quaists as volaiva impossessar il pessimismo, vale üna disanimusità del impossibel. La buna vöglija da far dal bain cura ed inua possibel, da succuorrer il comun cun buns cussagls, d'imbellir sias contradas e pisserar per nudritura spirituala e corporala adattada per giuvens e vegls avaiva la società demossà, – ed uossa? Ais forsa l'ouvra completta opür nauscha, chia tuot la lascha e be 9 stan cun ella? Na! L'ouvra eira et ais buna e bella, cuntinuains quella, in pro da nos char cumün ed in spranza d'ün meglider avegnir..."

Nu tuna quai sco eir amo da noss dis? A lair pasar quai cha la società vaiva però fingià raggiunt in ca. 20 ons d'existenza nu füssa probabelmaing stat tant motiv da s'almantar. In fat, i's po constatar, cha la gronda part dals interess chi'ns occupan amo hoz illas radunanzas d'eiran fingià quella jada problems per l'Ütil public:

Co agir sülla vita dal cumün per interessar il public in dumondas actualas, saja sül chomp dal progress social o cultural, e co contribuir cul ajen exaimpel vi da quellas?

Bain üna da las prümas ouvas cha commembers bainpensants han effetuà a Sent, es statta l'implantaziun da la bos-cha lung las stradellas vers Scuol e Crusch. Quellas duos vias d'eiran gnüdas fattas i'ls ons 1865 / 1866, davo cha'l stradun, a grond displaschair da blers Sentiners, d'eira gnü manà suot il cumün oura, invezza da sur Ftan nan per la spuonda a Sent. Las funtanas d'aua minerala a Nairs ed il svilup dal lö da cura da Scuol vaivan per glivrar portà la victoria, bain la prüma da l'industria d'esters in Engiadina Bassa cunter ils cumüns paurils. A Sent as bramaiva davo l'avertüra dal stradun dad avoir però üna colliaziun directa cun quel, e perquai la prescha da crear progets per vias lateralas o stradellas chi vaivan da manar sülla via maistra. In quels ons d'eiran las ideas, co ed ingiò cha quellas vessan da gnir fattas fich animadas in cumün. Cunter il proget effetuà hoz vers Scuol es cumparü dafatta in Italia üna broschüra stampada cul titel: „*Quortas osservaziuns riguardo las stradellas da construir sül teritori da Sent.*“ (Pontedera, tipografia Ristori, 1864). Nos convaschin sar Lüzza Crastan as externa in quella in favur d'ün traget chi vess sieuü la via veglia vers Scuol, dimena in s-chivind la chavorgia da Val da Muglins culla punt nouva suot oura ch'el resguarda sco ün'idea impussibla. Il cumün ha decis però istess in favur dal proget preschantà dals indschengners, e la stradella cun sia pendenza regulara ans es hoz agredida. Cul cumün da Scuol d'eira stat però amo da rumper diversas nuschs avant co pudair passar tras seis territori, tant cha per glivrar Sent ha gnü da pajar bod tuot ils cuosts per la construcziun. Da quist sentimaint es probabelmaing sorti il giavüschi da crear l'allea existenta per muossar als da Scuol che cha Sent d'eira in cas da metter nan, e qua ha la prüma Società d'Ütil public aint pels ons 70 dal secul passà chöntschi effetuà sia prüma mera a prô dal cumün. Chi cha'ls bainpensants sun stats, nu savaina hoz, ma i sun in prüma lingia da presumer cumpatriots in Italia sco iniziants da la chosa. Incirca da listess temp derivan ils bös-chs implantats lung la via vers Crusch.

Tanter 1875 e 1894 para cun quai "l'Ütil public", sco ch'el as varà nomnà fingià quella jada, d'avair fingià realisà ün pêr da sias meras: Imbellimaint dal cumün, sustegn da la vita sociala cun arrandschamaints da teater etc., iniziativa a bön da la vita publica cun fuondar üna società speciala chi ha laschà construir l'hotel Rezia, creaziun d'üna piazza da glatsch e sustegn finanziel per megldrar las vias in cumün. Quistas meras sun bainschi gnüdas schlargiadas ed amplifichadas tras üna schurma da novas ideas sortidas dals commembers, sainza però bandunar la lingia primaria dals fundatuors. Il büschmaint e la fuorma as müdan, il spiert es quel chi resta. E quel tuna fingià in l'artichel inicial pro la revisiun dals statüts dals 15 november 1899:

"La Società d'Ütil public da Sent ha per scopo la cultivaziun della vita sociala e la promoziun d'ogni progress".

Perquai han eir noss plü rezaints Tschantamaints dals 3 settember 1941 mantgnü in lur artichel 1 la mera superiura:

"La Società d'Ütil public da Sent ha la mera da promover tuot quai chi'd es a vantach dal bain public, e da cultivar la vita sociala".

Illas quatter ediziuns dals statüts chi as sieuan – las prümas dad avant il 1895 nu sun plü avant man – as vezza tanter las lingias cleramaing **la cumposiziun da quels chi faivan part a "l'Ütil public"**. I sun homens – plü tard eir duonnas – chi as chattaivan in dovair da star aint in comuniun pel böt ideal da servir al cumün, magari schi d'eiran eir be pacs per as metter a disposiziun. Cha quai nu d'eira facil da mantgnair il fö da sacrifici, demuossa cleramaing tras tuot ils 67 ons daspö 1895 il **continuant almain** da stagnaziun passagera davo ün temp da prestaziun cun success. Qua nu güda gnanca da laschar scrodar dal 1895 la taxa d'entrada da 2.– fr. e d'abstrahar a norma dals statüts dal 1899 d'üna racumandaziun speciala d'almain ün commember per gnir accolt aint illa società. Scha listess quel puogn plain da fidels es restà al timun e nun as ha laschà discuraschir da las criticas adüna pardertas, as po admirar la constanza dals vegls commembers.

Ma laschain quistas constataziuns per dar ün'ögliada in quai cha la Società d'Ütil public ha inizià e realisà in seis bod 90 ons d'existenza. Qua das-chaina cun alch dret manzunar il prüm da tuot sia **mischiun culturala**, v. d. la chüra da la vita spiertala e sociala in cumün. Id es fingià gnü relatà aint il protocol l'interess chi regnaiva pel **teater** da quel temp. El d'eira probabelmaing mantgnü our dal temp antic, cur cha fingià aint pel 1500 sun gnüts giovats in Engiadina ils gös biblics „*Las Desch etats*“ da Gebhard Stupan dad Ardez etc. chi radunaivan in ün dals cumüns bod tuot la populaziun da la vallada. OTRAS distracziuns, sco cha'l temp modern spordscha tras radio, televisiun e kino in surabundanza, mancaivan fin al glim da nos secul, quai chi aint pel 1800 ha dat nouv stimol a l'art dramatic aint ils cumüns. A Sent es quai impustüt il merit da l'Ütil public, d'avair dat il stimol cha'ls talents dramatics vegnan a lur dret, e bleras da las rapreschantaziuns dattas sülla veglia sala da l'hotel Rezia sun restadas in buna memoria. Culs mezs primitivs da quella jada esa gnü sport a la populaziun üna seria da buns tocs, fond adöver da l'agen palc e scenarias creats a cuost da la società. Eir aint illa veglia sala da cumün in chasa da scoula, hoz dovrada sco magazin da pumpiers, sun gnüts dats tocs da teater da valur. Ils blers manzunats aint ils protocols sun in lingua tudais-cha. Uschè vain relatà l'inviern 1896/1897 il drama „*Dr. Klaus*“, propost ed inscenà da la Cumischiun dramatica cul dr. Küng, magister secundar Gudench Barblan e magister Duri Pitschen sco commembers. Che d'eira da far oter, siond cha la litteratura dramatica rumantscha mancaiva quella jada bod dal tuot? Rechav net: 100.– fr.! Plü tard sieuan l'operetta „*Zehn Mädchen und kein Mann*“, il toc burlesc „*Unsere Frauen*“, „*Else vom Erlenhof*“, „*Der Raub der Sabinerinnen*“, „*Die Rantzau*“ e. u. i., üna seria da tocs schelts chi han eir fuormà ils actuors.

Scha cul ir dal temp – impustüt davo il 1920 – la Società d'Ütil public ha vieplü da rar arrandschà agens teaters, esa d'attribuir quai a la fundaziun d'üna Società dramatica, sortida da seis ravuogl e daspö lönch darcheu svantada, scopür a la concorrenza da las otras societats in cumün chi – cul giavüsch realistic dad implir lur chaschas – han plan a plan surtut bod exclusivamaing la mischiun teatrala da l'Ütil public. Il palc es gnü surlaschà ad ellas cunter pitschen fit, ed in plüs cas esa dafatta gnü abstrahà da dumandar üna taxa a favur da la relativa società. Amo hoz es cun quai il palc insembel cullas scenarias restantas in stadi lamentabel possess da l'Ütil public. Chi gnarà a tils dovrar, davo cha tuot s'ha müdà eir a Sent?

Dals blers **referats** tgnüts in part aint il ravuogl plü stret da la società ed amo plü suvent in sala cumünala, adüna però publics per minchün, pudaina ans restrindscher

be a l'essenzial. Els faivan al cumanzamaint part a bod mincha reuniun da l'Ütil public e daivan andit a las richas discussiuns sur da dumondas dal di sco dad interess special, quai cha hoz es rimplazzà dad oters mezs da comunicaziun. Gazettas e radio pavlan qua lur lectuors ed audituors bundantamaing cun sensaziun, tant cha'l singul nun ha gnanca plü il bsögn da tadar e tour part activa vi dals problems preschantats. El resta passiv, as lascha manar ed invlida furtünadamaing üna buna part da quai chi vain sport in quel lö. Il bler es intant adüna stat l'inimi dal bun, e perquai as sainta bain l'uman modern suvent abandonà in tuot seis savair e giavüscha directamaing alch oter. L'instancabla lavur prestada cun referats aint il Ütil public da Sent tras dr. Jon Paul Küng, magister Jachen Mosca, magister secundar Gudench Barblan, ravarenda Grand e tants oters es restada in buna memoria. Cha eir aint il temp preschaint lur fadia ha mantgnü sia valor, cumprova l'actività da la „Reuniun sociala“ da Scuol, ingio cha on per on vegnan amo arrandschats ils referats publics frequentats sco da vegl dad interessents per quel mez da s'instruir.

A listess intent sco las sairadas da referat han servi per lönch las **prelecziuns e discussiuns** sur dad ouvras litteraras. I nun es dal tuot cler, per che motiv ch'ellas sun gnüdas tschuncas, ma i's po suppuoner, cha eir la fundaziun da la „Società da lectura“ da Sent saja gnüda intimada da l'Ütil public. Quist'ultima es intant dalönch nan svantada, e sia biblioteca vain daspö il 1951 chürada d'üna cumischiun speciala da l'Ütil public.

Da manzunar restan amo ils **concerts** arrandschats fingià plü bod e lura la stà 1921 a favur dals incendiats in cumün, plünavant 1923, 1936 e 1937, tuot sün iniziativa da l'Ütil public. La chüra da la vita musicala es gnüda cun sustegn moral da nossa società eir a bön dals coros e da la musica instrumentala chi han adüna chattà ün man avert e bainvuglientscha pro ella.

A prô da la **scoula cumünala** as ha la Società d'Ütil public repetidamaing muossada interessada, e donaziuns fattas dad ella per ün o l'oter scopo tendschan fin aint il rezaint. Dals duos referats tgnüts a seis temp dal meritaivel dr. Küng als 6 e 20 marz 1895 in favur d'üna „*Reorganisaziun da nossas scoulas*“ esa fingià gnü dit. In seguit as legia adüna darcheu aint ils protocols da la società dad intimaziuns fattas per meglidar las scoulas, uschè quella dals 28 avuost 1913 merit instrucziun in lavuors manualas per mattas, ün'otra dals 3 december 1914 per stimular la cumprita da skis pels scolars, la contribuziun da l'Ütil public vi da las spaisas da viadi da la scoula secundara, da listess on l'offerta da güdar finanziair l'installaziun d'üna scoula da cuschinar per mattas, 1917 il postulat da dr. Jon Peer per installaziun d'ün bogn e duschas in chasa da scoula, 1918 las repetidas contribuziuns vi dal material per lavuors in lain dals mats. L'on 1917 vain acquistà ün apparat da projecziun ad adöver cumünaivel da società e scoula e listess on vaina intimà in üna tschantada da la Società da crear üna chascha da respargn pels scolars. La realisaziun da divers postulats lantschats cun quel böt es in part hoz amo musica da l'avegnir.

Man in man cullas meras culturalas cha la Società tschercha da ragiundscher va eir seis **pisser pels manglus ed amalats** chi in diversas occasiuns retschaivan our da nossa chascha contribuziuns per curas specialas, fliamaint a chasa ed oter, sainza cha'l public vegna a cogniziun da quai. La plü meritaivla lavur es però gnüda prestada là i'ls ons 1913 - 1915 in preparond aint illas sezzüdas da l'Ütil public la **fundaziun da nossa chascha publica d'amalats**, hoz instituziun independenta

davo esser statta dal 1916 - 1966 affiliada al cumün. Quants dubis e quants impedimaints sun in quell'ocasiun stats da balchar avant cha'l cumün ha pudü tour per mans l'execuziun da quist'ouvra, hoz indispensabla! A dis-charg dal cumün ha l'Ütil public l'on 1911 eir tut sur da sai il **custodi dal sunteri**, üna lavur pisserada plü tard per decennis a la lunga cun instancabla premura da nos fidel commember sar Flurin Stalvies, our da spür respet per noss trapassats. Onur a sia memoria! Pür davo sia mort ha la Società, nu chattond ingün chi vess pudü cuntinuar sia lavur, stuvü remetter quella darcheu al cumün.

L'ingluminaziun publica süllas vias es egualmaing gnüda effectuada sün intimaziun da l'Ütil public l'on 1911, davo cha quista as ha impegnada da gnir insembel, per part tras contribuziuns privatas, cun tuot ils mezs d'installaziun per 25 - 30 glüms a 16 chandailas. Il mantegniamaint e consüm da forza giaivan a charg dal cumün. E chi sa, forsa es eir fingià l'introducziun da la glüm electrica in cumün, l'on 1905, dad ingrazchar a la moziun fatta als 8 schner 1896 aint il ravuogl da l'Ütil public chattond là, sco cha'l protocollist remarcha: „*grand applaus, ma pac curaschi per l'intrapraisa. Qui vivra verra!*“

Ün dals impegns cha la Società d'Ütil public ha da prüma davent resguardà sco important es stat il **mantegniamaint da la piazza da glatsch**, affidà ad üna cumischiun speciala chi plü tard as nomna „Cumischiun da sport.“ I d'eira il temp, cur cha il bsögn per exercizi da corp cumanzaiva a's derasar eir pels mais d'inviern, e qua para cha Sent nu laiva star inavo ne a San Murezzan ne a Tavo, eir scha las premissas d'eiran differentas. Quella jà d'eira il patinar e'l jouslar l'unic sport chi gniva in dumonda. Quai ha stimulà a l'Ütil public fingià avant ils ons 90 da cumprar ün prà giò'n Prà Vital e da til far nivellar per pudair far lasura ün glatsch. Al cumanzamaint ha'l eir pisserà a seis cuost pel custodi dal glatsch. Ils protocols da 1896 e 1897 san da relatar ün rich adöver da quel. Da la „Cumissiun glaciale“, a la quala faivan part ils signuors Andrea Corradini, magister G. Barblan e president Anton Conradin, esa gnü propost da fixar las seguintas taxas per l'adöver dal glatsch d'urant la stagiun d'inviern:

per famiglias da commembers	5.– fr.
per commembers creschüts	2.– fr.
per oters creschüts	2.50 fr.
per uffants	0.50 fr.
per giornalieras	0.50 fr.
abunamaints da Nadal e Büman	1.– fr.

In seguit es gnü per blers ons surlaschè il custodi dal glatsch al faver sar Chasper Valentin chi vaiva per paja il dret da sfrüjar il prà i'l cuors da la stà. Surour quai vaiva el confuorm ad üna decisiun dals 2 november 1898 amo üna bunificaziun da 45. fr. l'on per mantgnair la saiv e'ls bancs intuorn il glatsch.

L'interess pel sport da patinar es lura i gradualmaing al main culla cumparsa da las „**assas norvegiasas eir nomnadas skis**,“ cumparüdas per la prüma jada a Sent intuorn il 1900. Amo lönch as güdaivan però ils puobs cun duas da butschins liadas cun cordas vi dals peis. Eir cul gnir da quist nouv sport ha l'Ütil public, sco cha nus savain, improvà da gnir incunter als scolars, in dond contribuziuns per l'acquist da skis, sco per arrandschar las prümas garas da ski per uffants. La „Cumischiun glaciale“ renunzcha da qua davent a seis nom chi fa gnir adimaint aventüras al pol

dal nord o sa Dieu ingiò aint ill'Antarctis, ed as cloma d'uossa invia in sen plü modern „Cumischiun da sport.“

Malavita es cun la victoria dals skis eir l'interess per l'otra paschiun da noss prüms capuriuns mundials da Sent i a perder: il jouslar. Eir a quella ha l'Ütil public impuondü tuott'attenziun, arrandschond per lõnch las prümas famusas jousladas giò da la via da Crusch chi fan eir fingià part al passà. Uschè relatescha l'actuar als 20 favrer 1895 la buna reuschida da la gara da creschüts cun 23 concurrents, dals quals 11 sun gnüts premiats. Il meglider esit – malavita sainza far palais il nom – raggiundscha per quel traget il temp sensaziunal da 2 minuts 55 secundas.

L'intent da contribuir a l'**imbellimaint dal cumün e seis contuorns**, forsa il prüm cha la Società ha gnü in ögl, vaina fingià manzunà. Las alleas süllas stradellas vers Scuol e Crusch han perquai adüna giodü ün'importanza privilegiada tanter las tractandas da l'Ütil public. I nun han però be vulgü mantgnair e rimplazzar bos-cha, ma eir tscherchè da garantir üna cuntinuaziun da quistas alleas dasper novas vias. Uschè vaina sondà pro la Cumischiun d'imbellimaint d'Engiadina bassa (l'antecessura da l'odierna Società da cura a Scuol) culla mera da guadagnar l'interess da quella per üna prolungaziun da noss'allea fin Scuol. Sainza success, causa ils cuosts cha quella tmaiva per amur dals da Sent! Illa radunanza dals 14 october 1908 vaina lura decis, cha la Società lascha effeuar üna **nouv'allea sülla via dal sunteri** e surpiglia a listess temp eir la chüra da la bos-cha in sunteri, bainschi in sperond, cha'l cumün furnischa il lainom pellas chabgias intuorn la bos-cha. Quista lavur es subit gnüda surdatta al giardinier Stocker da Scuol chi as ha impegnà da plantar la bos-cha i'l cuors da la stà 1909 a norma da 3.20 fr. il toc. Causa la mort dal giardinier amo intanta ch'el implantaiva as ha stuvü perincleger cun sia guaivda quant al glivrar la lavur e rimplazzar ils bös-chs sechs fingià il prüm on, quai chi'd es dvantà i'l cuors da la stà 1910. Als 10 october da quel on vaina stipulà cun sar Andrea Werro ün contrat, tenor il qual el surpigliaiva il custodi da las trais alleas vers Scuol, Crusch e sunteri per üna paja annuala da 30.– fr. Fingià als 8 november 1911 propuona il nouv silvicultur da Sent, sar Emil Bass, chi'd es a listess temp president da l'Ütil public, in ün extais votum la creaziun d'üna nouva allea sülla via vers Val Sinestra chi d'eira gnüda construida i'ls ons 1906 – 1907. Il referent craja, cha'l meglider as plantessa là culaischems, aschers, fraischens ed uolms, quintond per circa 300 bös-chs ün cuost intuorn 1'500.– fr. + spaisas da 500 – 1000 fr. pel lainom da las chabgias. L'execuziun da quist proget sto intant spettar, vis cha la Società da Val Sinestra nu respuonda subit a la dumonda, cun che contribuziun ch'ella pudess as participar vi da l'implantaziun. Percunter vaina l'an 1913 regalà dals commembers sar Peder Linsel e sar Jachen Corradini la bos-cha per dar sumbriva als bancs vers Scuol (2), vers Crusch (2), vers Val Sinestra (2) e vers il sunteri (1). Als 10 avuost 1917 as declera lura sar Jachen Corradini pront da surtour el il cuost pellas plantas bsögnusas dal cumün fin aint a Legnun e per rimplazzar ils bös-chs mancants vers Scuol, Crusch e sunteri. In nom da la Società da Val Sinestra as lubischa sün quai sar Fila Crastan da lair contribuir egualmaing 300.– fr. vi dal nouv traget, v. d. sia cuntinuaziun fin aint il Vinadi. Il mancant per cuernar las spaisas da quist toc allea, effeuada l'utuon 1919 e prümavaira 1920, es egualmaing il regal da sar Jachen Corradini.

Sainza success es stat il proget da l'Ütil public, d'implantar bos-cha e **s-chaffir ün godet sü Saranschasch**, intuorn l'odiern reservuar d'aua construi l'on 1914. La

prada d'eira fingià acquistada e tuot sün buna via, davo avair discussiunà sainza fin e fat progets dal 1915 – 1923, cur cha als 6 lügl 1923 la radunanza ha decis definitivmaing da bandunar quist proget, vendond darcheu ils bains. Listessa sort ha gnü dal 1929 e seg. la prouva dad implantar ün **godin oura Suot Crusch** culla mera da colliar quel culla lingia da bos-cha dal cumün lung la via veglia dadour la punt sur Val da Muglins. 9 ons a la lunga as han ils commembers da l'Ütil public s-charplinats pervi da quist'idea chi paraiva da correspuonder al bsögn dal cumün, vis cha Sent es situà uschè dalöntschi dal god. Il terrain in dumonda d'eira eir fingià cumprà, cur cha als 29 settember 1938 esa gnü decis da desister da la realisaziun da quel proget per motiv chi nu's d'eira persvas cha quai gniss alch inandret landroura.

Il pisser da render l'access al god plü pussibel schligeri ha cuntinuadamaing occupà las tracandas da la società. Vias e sendas sun perquai stattas ün dals problems ils plü suvent discutats in sezzüdas e radunanzas da l'Ütil public, bod cun propostas plausiblas e quattras eir persvasivas e bod eir be sortidas da straglüschs d'idea pro'ls commenders. Uschè as fastidiescha üna radunanza aint pel 1890 pel stadi deplorabel da la senda Crusch - Sur En chi metta in privel ils passants, ed istessamaing vaina conclüt da spordscher üna contribuziun al cumün per ch'el metta in uorden la vietta lung l'En da Sur En vers Pradella. In listess sen decida la radunanza dals 7 avuost 1923 da's partecipar vi dals cuosts per üna via vers Plan Mus-chan, ed als 19 october 1929 dad intimar e güdar a finanziar al cumün üna senda da spassegi vers Surains. Ils bancs, plazzats cul ir dal temp lung las stradellas, vias champestras e sendas sun adonta dal vandalissem provochà da l'idea cha quels servan "be a la signuria" adüna gnüts refats e giodan l'agremaint da blera glied plü veglia chi fa adöver dad els. Infra ils ultims ons esa gnü miss da quels eir cun agüd da donaziuns privatas. La plü rezainta acziun da quist gener ha l'on 1950 laschà effetuar tras l'Ütil public la senda giò pella costa suot la baselgia San Peder, da la Motta da Nuns via in Tiral e da là lung il god fin giò la punt San Valentin (Soblantin). Quista spassegiada nouva, marcada cun muossavias in cumün es i'ls ultims ons gnüda predschada impustüt dals esters chi passan lur vacanzas da stà a Sent.

Per la part, imbellimaint dal cumün e contuorns ha damaja la Società d'Ütil public sainza dubi fat fich blier, quai chi vain in general eir recugnuschü da nossa populaziun.

Dasper seis ajens impegns as ha lura l'Ütil public adüna darcheu eir occupà in sen activ cun problems chi giaivan a bön dal cumün, sainza esser directamaing la portadura da l'execuziun. Nus vain fingià manzunà las intimaziuns e'ls preparativs fats per introdüer la glüm electrica süllas vias cumünalas, l'interess per la scoula, l'impuls per fondar la chascha d'amalats e surtour il custodi dal sunteri. In quel lö tocca eir da nomnar l'inchaschamaint da la funtana da Bügliöl, fat cun nos sustegn, l'organisaziun da cuors per cultivar üerts, il stimul da fondar a Sent üna società da trafic, il subsidi pel plazzal cun salaschada davant la posta, las contribuziuns per inscripziuns rumantschas dals affars in cumün e da la chasa „Dieu güda“, il sustegn per imbellir il Plaz cun ün bügl in granit e pöst in stil dal pajais, la propotsa executada amo dal cumün, da render eir la via vers la baselgia meglder accessibla e.u.i.

Duos acziuns plü importantas, ingio cha la Società as ha partecipada in möd special, meritan quia da gnir nomnadas cun speciala menziun:

La reconstrucziun da la via tras cumün
il s-chodimaint da la baselgia

Tuottas duos van inavo al temp chi a blers ans es amo in immaint tendschond apaina 30 ons aint il passà. Chi less però renunziar a la comoda via maistra chi ha rimplazzà quella romantica da salaschada raduonda cun sias fouras e craps e pamparotta, ün pentizi pellas manadüras ed ün martiri per gliedud chi nu vaiva „Kappanägels“ aint illas s-charpas. Ella exista daspö il 1934, davo cha aint illa società d'Ütil public d'eira trais ons avant gnü miss a cour al cumün, da pisserar in möd radical per üna meglioraziun dal proget Saglina - Stron e Plaz - Curtin. La Società ha fat quai in intimond a nos commember e cunvaschin indschegner Jon Crastan d'elavurar ün proget cun salaschada da granit in quaders, per preschantar quel insembel culla perizia da cuosts al cumün. Tenor quist plan gniva in dumonda üna renovaziun cumpletta da la via cun spaisas d'incirca 80'000.– fr. Üna part da quel traiget, nempe il trunch Stron - Saglina, pudaiva quintar cun üna subvenziun chantunala da 50%, intant cha'l grond import stuvaiva gnir cuernà cun üna partecipaziun dal cumün e contribuziuns privatas per las qualas l'Ütil public stuvaiva as impegnar. Davo cha la radunanza cumünala vaiva dat als 15 marz 1933 la garanzia d'ün import da 18'000 fr. surstaiva a la Società da gnir insembel cun quai chi mancaiva, v. d. üna somma bain ampla a quella cha'l cumün contribuiva. Il comitè elet cun quell' incumbensa s'ha subit miss a l'ouvra ed ha fat buna lavur. Sainza scuraschir esa gnü battü porta in mincha chasa, e la gronda part dals abitants han generusamaing dat lur quattrin. Ün special lod merita eir in quist'ocasiun l'incletta da noss cumpatriots stabilits our d'cumün, saja in Svizra o a l'ester, chi s'han partecipats a l'ouvra ed han asgürà cun quella la finanziaziun. Uschè es la via gnüda fatta la stà 1934 da la firma STUAG a generala cuntantezza. Als 12 settember 1937 s'haja pudü serrar giò il quint cun l'esit d'ün cuost cumplet per la via da 90'421.– fr. A quels vaivan contribui:

il cumün:	fr. 21'787.–
il chantun:	fr. 47'000.–
privats tras l'Ütil public:	fr. 21'634.–

Al comitè inter ed impustüt a sar Fila Crastan sco persuna da liaschun culs cumpatriots a l'ester, implü al chaschier sar Flurin Stalvies esa gnü express in quell'ocasiun l'ingrazchamaint merità.

In möd sumgliaint es l'on 1938 / 1939 gnü inizià e manà eir ad üna buna fin il **s-chodimaint in baselgia**. Fingià dalönch innan as vaiva resenti il dabsögn da pisserar per quel, ma las finanzas da la Comunità evangelica nu permettaivan da tour quai in ögl sainza ün'imposta speciala a quel scopo. Chi paja jent impostas, magari a favur d'üna buna chosa! Perquai esa darcheu gnü discutà in üna radunanza da l'Ütil public quant a las pussibilitats dattas, ed as fidond sülla bun'incletta dals abitants in occasiun da la via esa danövmaing gnü lantschà ün'acziun per far alch inandret a favur da la baselgia. Davo avoir scleri la dumonda fundamentala sch'ün s-chodimaint electric vess servi a quai chi's spettaiva es gnüd'examinada eir la dumonda d'ün s-chodimaint d'ajer current cun pigna da laina. Intant d'eira sgür – in contrast cul proget da la via – cha ne subvenziuns chantunalas ne contribuziuns dal cumün, exceptuà la voluntà da quist da furnir gratuitamaing la laina dad arder, nu gnivan in dumonda. Uschè nu restaiva oter co d'appelar darcheu a la generosità dals

privats per gnir insembel culla somma da ca. 6500.– fr. bsögnusa a quel scopo. L'idea dal s-chodimaint ad ajer corrent es gnüda retgnüda per melgdra, ed in quel sen es gnüd'incumbenzada la firma Hälgi AG a San Galla d'effetur l'installaziun infra la stà 1939. Las lavuors han subi ün bain grond retard causa l'erupziun da la guerra in settember da quel on, han però istess pudü gnir manadas a fin i'l cuors da l'inviern. Malavita nun esa stat dat a l'iniziant da la chosa, il president da l'Ütil public da quella jada, professor Chasper Pult, da vair si'ouvra accumulida, qua cha la mort til ha clomà davent al principi da november da quel on. Il rendaquint da l'acziun „s-chodimaint da baselgia“ es gnü preschantà a la radunanza dals 3 settember 1941. Ils cuosts d'eiran bainschi in consequenza da la guerra creschüts per bainquant sur la perizia da spaisas oura sün 6'765.35 fr. Els d'eiran però cuernats cumplettamaing culla collecta in cumün d'intuorn 5'800.– fr. ed üna contribuziun speciala da l'Ütil public da 1'000.– fr., tant cha al president da baselgia da quella jada, sar Domenig Poo, ha amo pudü gnir impalmà insembel culs quints saldats ün import da vanz da 391.75 fr. Davo cha nos s-chodimaint a l'ocasiun da la renovaziun cumpleta da la baselgia, l'on 1958, ha pudü gnir müdà cun pigna ad öli, pudaina esser grats als iniziants da l'Ütil public d'avair cun tanta premura assistü a la raspada da Sent. Cha güst per bsögns da la baselgia la Società d'Ütil public ha demuossà üna grond'incletta cun asgürrar danövmaing illa radunanza da l'avuost 1962 üna contribuziun da 1'000.– fr. vi da las spaisas da restoraziun, merita da gnir annotà specialmaing a cogniziun da generaziuns chi vegnan.

Stimats audituors,

A dudir tuot quists detagls chi van pro a l'actività da la Società d'Ütil public, in manzunond eir adüna darcheu contribuziuns a quel e tschel scopo a bönn da la generalità, as pudessa rivar a fosas conclusiuns. Las cifras, chi per tscherta glieud sun adüna quai chi quinta il prüm, laschan forsa crajer ch'ella dispuona da mezs illimitats per güdar finanzialmaing in tuot e dapertuot. Quai nun es malavita il cas. Ella nun es mâ statta richa e nu dvantarà neir i'l avegnir il Crösus suvent imaginà, pront a gnir incunter a mincha giavüschi. Sco exaimpel saja dit quia che cha las duos donaziuns a la baselgia han significhà per la facultà da la Società. L'on 1938 importaiva quella, cumprais l'inventar dal prà dal glatsch ed alch titels, dals quals as pudaiva dispuoner be dal fit – la valur dal palc da teater nu vain gnanca in dumanda – 8'590.40 fr. Ils 1'000.– fr. da contribuziun a la baselgia d'eiran damaja in quel mumaint vaira precis la mità da quai ch'ella disponiva in mezs fluids e bod 1/8 da tuot il possess da la Società. Chenün privel e chenüna instituziun publica füssan hoz amo parderts da contribuir da lur patrimoni voluntariamaing quista sporta da sacrifici per üna buna chosa? E darcheu la donaziun dal 1962, our d'üna facultà da ca. 9'000.– fr. i'l import da 1'000.– fr. per la restoraziun da la baselgia! Quia pon las sten modestas contribuziuns dals commembers da 2.– fr. l'on davaira far pacs miraculs. In divers cas han perquai dumondas da subvenziun occasiunà dischillusiuns, e dafatta pro'ls commembers malcuntantezza e critica averta o zoppada. Co far per gnir istess incunter a quai cha l'Ütil public ha da prüm innan resguardà per sia mischiun? Per pussibilitar a minchün da far part a la Società esa adüna gnü mantgnü il princip da tgnair las contribuziuns plü bassas pussibel: al cumanzamaint 1.– fr. l'on ed uossa daspö decennis 2.– fr. per commember. Cul numer da gnanca 60 interessents pon Els incirca calcular quant inavant chi's gniss, ad esser dependents be da quist'entrada. Las donaziuns fattas i'l cuors da bundant 90 ons han bainschi permiss da crear ün pitschen chapital, ma culs fits da quel nu's riva ün grond toc, pustüt davo

cha la svalütaziun da la munaida fa algar il avairs sco la naiv aint il sulai da prümavaira. I sto perquai in alch möd gnir tut in ögl las pussibilitats d'augmentar las entradas fluidas, per chi's possa eir inavant contribuir ingio chi's less güdar cun mezs finansials. Independenta da la müdada dal temp resta per furtüna la voluntà morala e la perseveranza da noss commembers, da cuntinuar culla nöbla mera da la Società malgrà ils impedimaints e minchatant eir scuraschimaint da quels chi stan al timun in fatscha a quai ch'els lessan tour per mans.

I füss da dir amo bler da quai chi va pro a l'Ütil public ed interessa forsa daplü als commembers co al public plü vast da quista saira: Dal creschaint e guaraint i'l numer da partecipants, da fidela lavur prestada d'ürant decennis dals istess homens, na be in interess da la società, ma da l'inter cumün. Laschain quai tuot in quist lö, perche i nu füss dal sgür na i'l intent dals blers chi nu sun plü tanter da nus, da gnir lodats perquai cha per els as inclegiaiva da sai. Il puogn plain chi'd es malgrà tuot restà fidel a la chosa nun es mai stat e nu sarà neir in avegnir quella fradglianza paschaivla chi füss adüna da listessa idea. Chi less metter tuot in ögl cun esits visibels e palpabels, cun iniziativa per ün progress chi fess eir our da nos Sent ün seguond San Murezzan, chi as interessa per alleas e sendas dad ir a spass ad imbellimaint dal cumün, e chi metta il grond pais sün quai chi vess dad esser plü d'ürabel eir sainza chi's vezza dapertuot e subit quai cha l'Ütil public es in cas da prestar. Per furtüna esa uschea! Dasper ils merits cha la Società dascha cun tuot dret far palais, e chi in quist lö **nu** sun gnüts nomnats be per as gloriar da quels, sto eir la prudenza da s-chivir experimaints privlus per la generalità gnir a seis dret, eir scha quella nu vain adüna predscheda dal public. L'essenzial resulta pür our da la voluntà persvasiva da's chattar in quel lö ingio cha differents avis madüreschan a fats da valur. Quist trat uman ha in meis ögls contribui daplü co ideas spontanias amo uschè brigliantas a realisar üna buna part da quai cha l'Ütil public ha ragiunt cun si'actività. Nu füssa in quel sen pussibel da cultivar, almain tanter commembers, il rapport vicendaivel plü suvent co be a l'ocasiun da las radunanzas da minch'on? Eu chat cha in quel grà eschna hoz plü dalönch da quai chi stess esser co infra ils prüms decennis da nossa Società, cur chi's gniva insembel regularmaing almain i'l cuors da l'inviern a discutir quai e tschai. I nu fa lura gnanca dabsögn da blers per as chattar in quel lö: suvent basta da duos o trais per drizzar oura fingià fich bler. Cha l'Ütil public possa eir in avegnir cultivar in quel möd – dasper seis intents tradiziunals – eir üna sana vita da cumpagnia aint in nos cumün, in spiert social o cultural, es meis giavüsch. Forsa cha l'agüd spiertal als oters serviss in quel möd amo meglder a la populaziun intera co culla munaida cha nus impuondain ingio chi fa dabsögn. Far l'ün sainza interlaschar l'oter es ün dals misteris per adempir inavant la mera da l'Ütil public.

Organs da la società d'Ütil public SENT

	<u>president</u>	<u>actuar</u>	<u>chaschier</u>
1897	Dr. med. Jon Paul Küng	Anton Conradin	Gudench Barblan
1898	Andrea Corradin	mag. Jachen Mosca	Gudench Barblan
1899	Andrea Corradin	mag. Jachen Mosca	Töna Crastan
1900	mag. Jon Grand	mag. Jachen Mosca	Ans Vital
1902	mag. Duri Pitschen	mag. Din Peer	Ans Vital
1903	Peder Stalvies	mag. Din Peer	Ans Vital
1904	mag. Jachen Janett	mag. Din Peer	mag. Cla Jann

1907	Men Lansel	mag. Din Peer	mag. Cla Jann
1910	mag. Jon Arnold Egen	mag. Din Peer	mag. Cla Jann
1912	mag. Cla Jann	mag. Din Peer	mag. Jon Arn. Egen
1913	silv. Emil Bass	mag. Din Peer	mag. Jon Z. Valentin
1914	silv. Emil Bass	Jachen Corradini	Giov. Schucany
1915	Jachen Corradini	mag. Clot Pitschen	Giov. Schucany
1916	mag. Jachen Janett	mag. Clot Pitschen	Giacomin Werro
1918	mag. Jachen Janett	mag. Clot Pitschen	Giacomin Werro
1921	dr. med. Jon Pl. Peer	Nicolin Zonder	Giacomin Werro
1922	Giacomin Werro	Chasper Corradin	Jon L. Gianom
1923	Richard Frigg	Chasper Corradin	Jon L. Gianom
1924	Ans Vital	Giov. Schucany	Jon Gotsch Lansel
1926	Nicolin Zonder	mag. Clot Pitschen	Victor Denoth
1927	Nicolin Zonder	Giacomin Werro	Giov. Schucany
1930	mag. Duri Pitschen	Giacomin Werro	Ans Stupan
1932	mag. Duri Pitschen	Giacomin Werro	Ans Stupan
1935	mag. Duri Pitschen	Giacomin Werro	Flurin Stalvies
1939	prof. Chasper Pult	Giacomin Werro	Flurin Stalvies
1940	Flurin Stalvies	Giacomin Werro	Men Ch. Schmidt
1943	Flurin Stalvies	Giacomin Werro	Not Balt. Poo
1950	insp. Töna Schmid	Giacomin Werro	Flurin Stalvies
1953	insp. Töna Schmid	mag. sec- Fl. Bischoff	Flurin Stalvies
1955	insp. Töna Schmid	mag. sec- Fl. Bischoff	Peder à Porta
1959	dr. jur. Emil Alexander	mag. Reto Luppi	Victor Denoth
1962	dr. jur. Emil Alexander	Lüzza Stalvies	Victor Denoth
1963	dr. jur. Emil Alexander	Lüzza Stalvies	arch. Val. Pitschen
1964	dr. jur. Emil Alexander	Lüzza Stalvies	arch. Val. Pitschen
1967	Men Stupan	Töna Schmid	arch. Val. Pitschen
	Otto Augustin	Töna Schmid	Talin Mayer
1916 - 1962	ha funcziunà sco chüradur da nossas alleas signur silv. Emil Bass.		